

«Omadus candidats han experientscha politica»

Partida socialdemocratica dal Grischun

DA GION NUTEGN STGIER / ANR

■ **Naginas dunnas, er na Jon Pult, ma bain cun ils dus deputads Peter Peyer ed Andreas Thöny va la ps grischuna en l'elecziun preliminar per la regenza. Suenter intginas decisiuns internas da la partida e la preseleziun publica nominascha ella lura ses candidat uffizial.** Grond interess medial venderdi en il secretariat da la Partida socialdemocratica grischuna (ps) a Cuira. Envidà aveva la partida ils meds da massa per la preschentaziun dals candidats ubain da las candidatas per la candidatura per la regenza grischuna dal zercladur 2018. Già dapi in temp è public che *Martin Jäger*, l'actual cusseglier guvernativ da la ps, renunzia ad ina ulteriura candidatura e sa retira suenter be otg onns en uffizi da ses mandat. Liber vegn dentant er il post da cusseglier guvernativa *Barbara Janom Steiner* (pbd), cun esser a fin sia incumbensa politica pervia da la limitaziun dal temp d'uffizi. La finamira dals socialdemocrats è dad er esser suenter las elecziun da la regenza en 16 mais vinavant represchentads en l'executiva chantunala.

Ina buna tscherna

A pled sco emprimas duas da las tschintg personas che stevan en discussiun per candidar per la regenza èn vegnids ils dus deputads *Peter Peyer* da Trin ed *Andreas Thöny* da Landquart. Suenter lur lungs plects a favur da lur candidatura è bunamain stà cler che la ps vegn ad ir cun quels dus candidats en il cumbat electoral preliminar. *Philipp Wilhelm*, il president da la ps grischuna, ha ditg che la partida sa-



In ubain l'auter vegn a candidar per la regenza grischuna: Peter Peyer (a san.) ed Andreas Thöny.

FOTO G. N. STGIER

ja en la situaziun ventiraivla dad avair a disposiziun daplis candidatas e candidats elegibels per la regenza cun ils dus nominads, cun *Beatrice Baselgia* da Domat, *Sandra Locher Benguerel* e *Jon Pult*, omadus da Cuira. La direcziun e la cumissiun d'elecziun haja fatg cun nominar Peyer e Thöny sco candidats per daventar cussegliers guvernativs ina buna tscherna.

Bain ina pitschna surpraisa

Insaco è la conferenza da medias tuttina ida a fin cun ina surpraisa, era plitost da quintar cun ina nominaziun da trais personas en pe da be duas personas. Dasper Peyer e Thöny fiss la nominaziun da la deputada *Sandra Locher Benguerel* segir stada nagina surpraisa. Cun betg esser la dunna e scolasta tranter ils «papabiles» da

la ps per ina candidatura per la regenza ha la direcziun da la ps bain fatg surstar blers. Ella haja già decidì en il decurs da l'atun 2016 da na sa metter a disposiziun per quel uffizi, ha ditg *Locher Benguerel*. La dunna ha er menziunà ch'ella haja da preschent er naging interess da far ina midada professiunala. Ella saja gugent scolasta e deputada cun corp ed olma.

Ambiziuns sin il champ naziunal

Cun passa 60 onns vegnia ella a prender la vita cun in pau dapli calmezza, ha ditg *Baselgia*, la deputada ed anteriura presidenta communal da Domat. Quai saja ina raschun ch'ella renunzia a la candidatura per in post en la regenza, ha ella accentuà. Per blers il superfavorit per daventar successur da *Martin Jäger* era il deputà, l'antier president e «shooting star» da la ps grischuna, *Jon Pult*. El vegnia a candidar il 2019 per in post en il cussegl naziunal ed haja da preschent naging interess da daventar cusseglier guvernativ. Sias ambiziuns politicas sin champ naziunal èn enconuschantas e che Pult vegn segir a far quella via è già ussa pli che cler.

Candidaturas èn anc adina pussaivlas da far

Er sche la ps grischuna ha preschentà cun Peyer e Thöny ses dus candidats preferids per las prelecziuns per la regenza chantunala èsi fin ils 20 da mars anc adina pussaivel d'inoltrar autras candidaturas. La ps emprova in nov sistem per nominar uffizialmain ses candidat per la elecziun dal 2018. Via internet ha mintgin la chaschun da sa registrar e lura far la tscherna tranter ils dus candidats. Peyer e Thöny èn omadus «vulps veglias» da la politica, uschia che già l'elecziun preliminar chaschuna segir gronda tensiun. A la fin da zercladur da quest onn savain nus dapli.

L'adressa per sa registrar: www.vorwahlen.ch